

四庫全書

子部

欽定四庫全書

冊府元龜卷六百七十六 宋 王欽若等 撰

牧守部

教化

孔子曰道之以政齊之以刑民免而無耻道之以德齊之以禮有耻且格然則德禮之與政刑感人之深淺成俗之厚薄可知也自堯命州牧事多闕文秦置郡守民罕見德迨于兩漢之世始有循吏之名或興學而化行

或修禮而教闡或引咎而人知勸或掩過而人遷善若
文翁韓延壽之屬皆著異迹煥乎惇史後之繼踵比比
有焉非夫仁信篤誠寬厚清靜正其身而率下者孰能
至於此哉

漢文翁廬江舒人也少好學通春秋以郡縣吏察舉景
帝末為蜀郡守仁愛好教化見蜀地僻陋有蠻夷風文
翁欲誘進之乃選郡縣小吏開敏有材者張叔等十餘
人親自飭厲遣詣京師受業博士或學律令減省少府

用度買刀布蜀物齋計吏以遺博士

少府郡掌財物之府以供太守者也

刀凡蜀刀有環者也布蜀布細密也二者蜀人作之皆善故齋以為貨無限於書刀布刀也

數歲蜀

生皆成就還歸文翁以為右職

郡中高職也

用次察舉官有

至郡守刺史者又修起學宮於成都市中

學宮學之宮舍

招下

縣子弟以為學官子弟

下縣四郊之縣非郡所治也

為除更繇

不令從役

也高者以補郡縣次為孝弟力田常選學官僮子使在

便坐受事

便坐別坐可以視事非正廷也

每出行縣益從學官諸生明

經飭行者與俱

益多也

使傳教令出入閨閣

閨閣內中小門也

縣

邑吏民見而榮之數年爭欲為學官弟子富人至出錢以求之繇是大化蜀地學於京師者比齊魯焉至武帝時乃令天下郡國皆立學校官自文翁為之始

韓延壽為潁川太守潁川多豪強難治國家嘗為選良二千石先是趙廣漢為太守患其俗朋黨故構會吏民令相告訐構結也一切以為聰明潁川繇是以為俗民多

怨讐延壽欲改更之教以禮讓恐百姓不從乃歷名郡中長老為鄉里所信向者數十人設酒具食親與相對

接以禮意又問以謠俗民所疾苦

謠俗謂閭里歌謠政教善惡也

為陳

和睦親愛銷除怨咎之路長老皆以為便可施行因與

議定嫁娶喪祭儀品畧依古禮不得過法延壽於是令

文學校官諸生皮弁執俎豆為吏民行喪嫁娶禮百姓

遵用其教賣偶車馬下里偽物者弃之市道

下里地下萬里偽物

也偶木土為人象真車馬之形也偶對也弃其物於市之道上也

數年徙為東郡太守

延壽為吏上禮義好古教化所至必聘其賢士以禮待

用廣謀議納諫爭舉行喪讓財表孝弟有行修治學宮

學宮謂庠序之舍也

春秋鄉射陳鐘鼓管絃盛升降揖讓及都試

講武設斧鉞旌旗習射御之事治城郭收賦租先明布

告其日以期會為大事吏民敬畏趨鄉之延壽接待下

吏恩施甚厚而約誓明或欺負之者延壽痛自刻責豈

其負之何以至此

言豈我負之邪其人何以為此事

吏聞者自傷悔其

縣尉至自刺死及門下掾自剄人救不殊因瘖不能言

殊絕也以人救之故身首不相絕也

延壽聞之對掾史涕泣遣吏醫治視

遣醫治之而吏護視之

厚復其家延壽常出臨上車騎吏一人後

至敕功曹議罰白

今定其罪名而更白之

還至府門門卒當車願有

所言延壽止車問之卒曰孝經曰資於事父以事君而

敬同故母取其愛而君取其敬兼之者父也

資取也取事父之道

以事君其敬則同故母則極愛君則極敬不如父之兼敬也

今旦明府早駕久駐未

出騎吏父來至府門不敢入騎吏聞之趨走出謁適會

明府登車以敬父而見罰得母虧大化乎延壽舉手與

中曰微子太守不自知過

微無也

歸舍召見門卒卒本諸

生聞延壽賢無因自達故代卒

代人為卒也

延壽遂待用之

其納善聽諫皆此類也入守左馮翊歲餘不肯出行縣丞掾數白宜循行郡中覽觀民俗考長吏治迹延壽曰縣皆有賢令長督郵分明善惡於外行縣恐無所益重為煩擾丞掾皆以為方春月可一出勸耕桑延壽不得已行縣至高陵民有昆弟相與訟田自言延壽大傷之曰幸得備位為郡表率不能宣明教化至今民有骨肉爭訟既傷風化重使賢長吏嗇夫三老孝弟受其耻咎在馮翊當先退是日移病不聽事因入卧傳舍閉閣思

過一縣莫知所為令丞嗇夫三老亦皆自繫待罪於是

訟者宗族傳相責讓此兩昆弟深自悔皆自髡肉袒謝

願以田相移終死不敢復爭

兄以讓弟弟又讓之故云相移

延壽大喜

開閣延見內酒肉與相對飲食厲勉以意告鄉部有以

表勸悔過從善之民

以其悔過從善故令表顯以示勸勵

延壽乃起聽事

勞謝令丞以下引見尉薦郡中歛然莫不傳相勅厲不

敢犯延壽恩信周遍二十四縣莫復以辭訟自言者推

其至誠吏民不忍欺給

給詎也

黃霸為潁川太守宣帝垂意於治數下恩澤詔書吏不

奉宣

不全百姓皆知也

霸為選擇良吏分部宣布詔令

分扶令問反

民咸知上意使郵亭鄉官皆畜雞豚

郵行書舍謂傳送文書所止處亦如

今之驛館者以鄉所治處也以贍鰥寡貧窮者

薛宣為左馮翊得郡中吏民罪名輒召告其縣長吏使自行罰曉曰府所以不自發舉者不欲代縣治奪賢令長名也長吏莫不喜懼免冠謝宣歸思受戒者

何武為揚州刺史二千石有罪應時舉奏其餘賢與不

肖敬之如一是以郡國各重其守相州中清平行部必

先即學宮見諸生

即就也學宮學舍也

試其誦論問以得失意

後漢寇恂光武時為汝南太守盜賊清靜郡中無事恂素好學乃修鄉校教生徒聘能為左氏春秋者親受學焉

李忠為丹陽太守以丹陽越俗不好學嫁娶禮儀哀於

中國乃為起學校習禮容春秋鄉飲

校亦學也禮記鄉飲酒之義主人拜

迎賓於庠門之外三揖而後至階三讓而後升堂所以致尊讓也七十者坐五十者立侍以聽政役所以明尊

長也合諸鄉射教之鄉飲酒之禮而孝弟之行立

選用明經郡中向慕之

衛颯為桂陽太守郡與交州接境頗染其俗不知禮則颯下車修庠序之教設婚姻之禮期年間邦俗從化

任延為會稽都尉每時行縣輒使尉勉孝子就飧飯之後為九真太守駱越之民無嫁娶禮法各因淫好無適對匹不識父子之性夫婦之道延乃移書屬縣為使男年二十至五十女年十五至四十皆以年齒相配其貧無禮聘令長吏以下各省奉祿以賑助之同時相娶者

二千餘人是歲風雨順節穀稼豐衍其產子者始知種
姓咸曰使我有是子者任君也多名子為任於是徼外
蠻夷夜郎等慕義保塞延遂止罷偵候戍卒初平帝時
漢申錫光為交趾太守教導民夷漸以禮義化聲侷於
延王莽末閉境拒守建武初遣使貢獻封鹽水侯嶺南
華風始於二守焉又為武威太守造立校官自掾吏子
孫皆令詣學受業復其徭役章句既通悉顯拔榮進之
郡遂有儒雅之士

秦彭為山陽太守以禮訓人不任刑罰崇好儒雅敦明庠序每春秋享射輒修升降揖讓之儀乃為人設四誠以定六親長幼之禮有遵奉教化者擢為鄉三老嘗以八月致酒肉以勸勉之吏有過咎罷遣而已不加耻辱百姓懷愛莫有欺犯

張湛為左馮翊在郡修典禮設條教政化大行

歐陽歙為汝南太守世傳伏生尚書在郡教授數百人伏恭為常山太守明齊詩敦修學校教授不輟繇是北

州多為伏氏學

王追為益州郡太守始興起學校漸遷其俗

廉范歷武威武都二郡太守隨俗化導各得治宜建初中遷蜀郡太守其俗尚文辯好相持短長范每厲以淳厚不受偷薄之說

羊續為南陽太守班宣政令候民利病百姓勸服時權豪之家多尚奢麗續深疾之嘗弊衣薄食車馬羸敗

張霸為會稽太守表用郡人處士顧奉公孫松等奉後

為潁川太守松為司隸校尉並有名稱其餘有業者皆見擢用郡中爭厲志節習經者以千數道路但聞誦聲

鮑德為南陽太守時郡學久廢德乃修起黌舍備俎豆黼冕行禮奏樂又尊饗國老宴會諸儒百姓觀者莫不歡服

劉寬為東海相遷南陽太守典歷三郡溫仁多恕雖在倉卒未嘗疾言遽色嘗以為齊之以刑民免而無耻吏

人過但用蒲鞭罰之示辱而已終不加苦事有功善推之自下災異或見引躬克責每行縣止息亭傳輒引學官祭酒及處士諸生執經對講見父老慰以農里之言年少勉以孝悌之訓人感德興行日有所化

欒巴為桂陽太守以郡處南垂不閑典訓為吏人定婚姻喪紀之禮興立學校以獎進之雖幹吏卑末皆課令習讀程試殿最隨能升授

幹府吏之類也晉令諸郡國不滿五千以下置幹吏二人

郡縣皆有幹
幹猶主也

何敞為汝南太守敞疾文俗吏以苛刻求當時名譽故

在職以寬和為政立春日嘗召督郵還府

督郵主司察愆過立春陽

氣發生故召歸

分遣儒術大吏案行屬縣顯孝悌有義行者及

舉寃獄以春秋義斷之是以郡中無怨聲百姓化其恩

禮其出居者皆歸養其父母追行喪服

出居謂與父母別居者其親先

亡者自恨喪禮不足追行喪制也

推財相讓者二百許人

高譚等百八十五人推財

相讓置立禮官不任文吏

王暢為南陽太守郡中豪族多以奢靡相尚暢嘗布衣

皮褥車馬羸敗以矯其弊同郡劉表諫之暢曰昔公儀休在魯拔園葵去織婦孫叔敖相楚其子被裘刈薪夫以約失之者鮮矣聞伯夷之風者貪夫有立志雖以不德敢慕遺烈

袁安為河南尹政號嚴明然未曾以贓罪鞠人嘗稱曰學仕者高則望宰相下則希牧守錮人於聖世尹所不忍為也聞之者皆感激自勵在職十年京師肅然名重朝廷

應奉為武陵太守興學校舉仄陋

魏霸為鉅鹿太守以簡樸寬恕為政掾吏有過要先誨其失不改者乃罷之吏或相毀訴霸輒稱它吏之長終不及人短訴者懷慙譖訟遂息

許荆為桂陽太守郡濱南川風俗脆薄不識學義荆為設喪紀婚姻制度使知禮禁嘗行春到來陽縣人有蔣均者兄弟爭財互相言訟荆對之嘆曰吾荷國重任而教化不行咎在太守乃顧使吏上書陳狀乞詣廷尉均

兄弟感悔各求受罪邠人謝弘等不養父母兄弟分拆
因此皆還繼養者千有餘人也在事十二年父老稱歌
劉表為荊州刺史起立學校博求儒術綦母閭宋忠等
撰立五經章句講之

孔融為北海相立學校表顯儒術

魏表煥為梁相煥每勅諸縣務存鰥寡高年表異孝子
貞婦嘗談曰世治則禮詳世亂則禮簡全在斟酌之間
耳方今雖擾難以禮化然在吾所以為之為政崇教訓

恕思而後行外溫柔而內能斷

杜畿為河東太守是時天下郡縣皆殘破河東最先定少耗減畿治之崇寬惠與民無為民嘗辭訟有相告者畿親見為陳大義遣令歸諦思之若意有所不盡更來詣府鄉邑父老自相責怒曰有君如此奈何不從其教自是少有辭訟班下屬縣舉孝子貞婦順孫復其徭役隨時慰勉之漸課民畜牝牛草馬下逮雞豚犬豕皆有章程百姓勤農家家豐實畿乃曰民富矣不可不教也

於是冬月修戎講武又開學宮親自執經教授郡中化之郡人樂詳少好學畿署詳文學祭酒使教後進於是河東學業大興韓遂馬超之叛也弘農馮翊多舉縣邑以應之河東雖與賊接民無異心

王恂為河南尹建立二學崇明五經皆恂所定

令狐邵為弘農太守舉善而教恕以待人不好獄訟與下無忌時郡無知經者乃厯問諸吏有欲遠行就師輒假遣令詣河東就樂詳學經粗明乃還因設文學學業

轉興

顏斐為京兆太守起文學聽吏民欲讀書者復其小徭
又課民當輸租時車牛各因便致薪兩束為冬寒冰炙
筆硯於是風化大行吏不煩民民不求吏

劉馥為揚州刺史恩化大行於是聚諸生立學校

索招為鴈門太守簡選有才識者詣大學受業還相授
教數年中庠序大興

徐邈為涼州刺史收斂民間私仗藏之府庫然後率以

仁義立學明訓禁厚葬斷淫祀進善黜惡風化大行百姓歸心焉西域流通羌城入貢皆邈勲也

任嘏為河東太守所在化行有遺風餘教

劉邵為陳留太守敦崇教化百姓稱之

王凌為青州刺史時海濱喪亂之後法度未整凌布政施教賞善罰惡甚有綱紀百姓稱之不容於口徙為東豫州刺史咸得軍民之歡心始至豫州旌先賢之後求未顯之士各有條教意義甚美

王基為荊州刺史明制度整軍農兼修學校南方稱之
楊俊為南陽太守宣德教立學校吏民稱之

范粲為武威太守到郡選良吏立學校勸農桑又郡壤
富貴珍玩充積粲制之息其華侈

蜀王商為蜀郡守修學校廣農桑百姓便之

吳顧邵為豫章太守禁其淫祀非禮之祭者小吏姿質
有佳者輒令就學擇其先進擢置右職舉善以教風化
大行

晉曹志字允恭為樂平太守在郡上書以為宜尊儒重道請為博士置吏卒

李重為平陽太守崇德化修學校表篤行拔賢能清簡無欲正身率下

鄭袤為濟陰太守下車旌表孝悌敬禮賢能興立庠序開誘後進

陶侃為荊州刺史諸參佐或以談戲廢事者乃命取其酒器蒲博之具悉投之於江吏將則加鞭扑曰擣蒲者

牧豬奴戲耳老莊浮華非先王之法言不可行也君子當正其衣冠攝其威儀何有亂頭養望自謂宏達邪有奉饋者皆問其所繇若力作所致雖微必喜慰賜參倍若非禮得之則切厲訶辱還其所饋嘗出遊見人持一把未熟稻侃問用此何為人云行道所見抑取之耳侃大怒曰汝既不佃而戲賊人稻執而鞭之是以百姓勤殖家給人足

孔行為廣陵郡守雖隣接於賊猶教誘後進不以戎務

廢業

周處為楚內史郡既經喪亂新舊雜居風俗未一處敦以教義

虞傳為鄱陽內史大修庠序廣招學徒移告屬縣

范汪為東陽太守在郡大興學校甚有惠政

范甯汪子也為豫章太守在郡大設庠序遣人往交州探磬石以供學用改革舊制不拘常憲遠近至者千餘人資給衆費一出私祿并取郡四姓子弟皆充學生課

讀五經又起學臺功用彌廣江州刺史王凝之上言曰
豫章郡居此州之半太守臣甯入參機省出宰名郡而
肆其奢濁所為狼籍郡城先有六門甯悉改作重樓復
更開二門合前為八私立下舍七所臣伏思宗廟之設
各有品秩而甯自置家廟又下十五縣皆使左宗廟右
社稷準之大廟皆資人力又奪人居宅功夫萬計甯若
以古制宜崇自當列上而敢專輒惟存心州既聞知
即符從事制不復聽而甯嚴威屬縣惟令速立願出臣

表下太常議之禮典詔曰漢宣云可與共治天下者良二千石也若范甯果如凝之所表者豈可復宰郡乎以此抵罪子泰時為天門太守弃官稱訴帝以甯所務惟學事久不判會赦免

庾亮為征西將軍鎮武昌開置學宮亮薨乃廢

王承為東海太守有犯夜者為吏所拘承問其故答云從師受書不覺日暮承曰鞭撻甯越以立威名非政化之本使吏送令歸家

宋孔季恭為會稽內史修飭學校計課調習

蔡興宗為會稽太守三吳舊有鄉射禮久不復修興宗行之禮儀甚整先是元嘉中羊玄保為郡亦行鄉射杜慧度為交州刺史崇修學校

南齊劉悛為司州刺史於州治下立學校

虞愿為晉平太守在郡立學堂教授

豫章王嶷為荆湘二州刺史於南蠻園東南開立學上表言狀置四十人取舊族父祖位正佐臺郎年二十五

以上補之置儒林叅軍二人文學祭酒一人勸學從事
二人行釋菜禮

竟陵王子良為會稽太守時有山陰人孔平詣子良訟
嫂市米負錢不還子良嘆曰昔高文通與寡嫂訟田義
異於此乃賜米錢以償平

江祀為東海太守治下有宣尼廟久廢不修祀更開掃
構立

梁始興王憺出為益州刺史開立學校勸課就業遣子

映親受經焉繇是多向方者

殷均為臨川內史體羸多疾閉閣卧治而百姓化其德劫盜皆奔出境嘗禽劫帥不加考掠但和言誚責劫帥稽顙乞改過均使命遣之後遂為善人

陸襄為鄱陽內史有彭李二家因忿爭遂相告襄引入內室不加責誚但以和言解喻之二人感悟深自咎悔乃為設酒食令其盡歡酒罷同載而還因相親厚民歌曰陸君解無怨家鬪既罷讐言共車

柳惲為鄱陽相聽吏屬得盡三年喪禮著之文教百姓稱焉

張綰為豫章內史在郡述制旨禮記正言義四姓衣冠

士子聽者嘗數百人

王欽若等曰禮記正言是梁武所撰故稱制旨四姓謂朱張顧陸也

顧憲之為衡陽內史土俗山民有病輒云先為禍皆開塚剖棺木洗枯骨名為除祟憲之曉諭為陳生死之別事不相繇風俗遂改時刺史王奐新至唯衡陽獨無訟者乃歎曰顧衡陽之化至矣若九郡率然吾將何事

張緬為豫章內史緬為政任恩惠不設鈎距吏人化其德亦不敢欺故老咸云數十年未有也

後魏張恂為廣平太守招集離散開建學校優顯儒士吏民歌詠之

賈雋為荊州刺史先是上谷置荊州後改為雒州在重山民不知學雋乃表置學官選悟者以教之

李仲璇為兗州刺史以孔子廟墻宇頗有頽毀遂修改焉

裴延雋為幽州刺史以范陽人酈暉好學有文才用為主簿令其修起學校禮教大行民歌謠之

李平為相州刺史勸課農桑修飭太學簡試通儒以充博士選五郡聰敏者以教之圖孔子及七十二子於講堂親為之贊

劉道斌為弘農太守修立學館建孔子廟堂圖畫形像盧道將為燕郡太守優禮儒生勵勸學業敦課農桑墾田歲倍

張萇年為汝南太守有郡民劉崇之兄弟分拆家貧唯有一牛爭之不決訟於郡庭萇年見之悽然曰汝曹當以一牛故致此競脫有二牛各應得一豈有訟理即以家牛一頭賜之於是郡境之中各相誠約咸敦敬讓裴安祖河東聞喜人弱冠州辟主簿民有兄弟爭財詣州相訟安祖召其兄弟以禮義責讓之此人兄弟明日相率謝罪境內欽服之

韋或為東豫州刺史綏懷蠻左頗得其心蠻首田益宗

子魯生魯賢先叛父南入數為寇掠自或至州魯生等咸賤啟修敬不復為害或以蠻俗荒梗不識禮義乃表立大學還諸郡生徒於州總教

李訢為相州刺史上疏求立學校曰臣聞至治之隆非文德無以經綸王道太平之義非良才無以光贊皇化是以昔之明王建庠序於京畿立學宮於都邑教國子弟習其道藝然後選其俊異以為造士今聖治欽明道隆三五禮服之民咸仰德化而所任州土學校未立臣

雖不敏誠願備之使後生聞雅頌之音童幼覩經教之本臣昔蒙恩寵長管中祕時課修學有成立之人髦俊之士已蒙進用臣今重荷榮遇顯任名岳思闡帝猷光宣於外自到已來訪諸文學舊德已老後生未進歲首所貢雖依制遣對問之日懼不克堪臣愚欲仰依先典於州郡治所各立學宮使士望之流冠冕之胄就而受業庶必有成其經藝通明者貢之天府則郁郁之文於是不墜書奏獻文從之

高允為懷州刺史時年將九十勸民學業風化頗行
蕭寶寅為徐州刺史起學館朔望引見四姓子弟接以
恩顏與論經義勤於政治吏民愛之

崔辯為武邑太守政事之餘專以勸學為務

崔遊為河東太守大學舊在城內遊乃移至城南開敞
之處親自說經當時學者莫不勸慕號為良守

高祐為西兗州刺史以郡國雖有大學縣黨宜有黌序
乃縣立講學黨立小學

崔孝暉為趙郡太守興立學校親加勸督百姓賴之
楊津為華州刺史先是受調絹度尺特長在事因緣共
相進退百姓苦之津乃令依公尺度其輸物尤好者賜
以杯酒而出所輸少劣亦為受之但無以示其耻於是
人競相勸官調更勝舊日又為岐州刺史巨細躬親孜
孜不倦守令寮佐有濁貨者未曾公言其罪嘗以私書
切責之於是官屬感厲莫有犯法

寇雋為梁州刺史民俗荒穢多為賊盜雋乃令郡縣立

為庠序勸賊盜使歸農桑敦以禮讓數年之中風俗頓
革

北齊鄭述祖父道昭先為兗州刺史述祖天保初又為
之有人入市盜布其父怒曰何忍欺人君執之以歸首
述祖特原之自是之後境內無盜人歌之曰大鄭公小
鄭公相去五十載風教猶相同

蘇瓊為南海太守有百姓乙普明兄弟爭田積年不斷
各相援引乃至百人瓊召普明兄弟對衆人語之曰天

下難得者兄弟易求者田地假令得田地失兄弟心如
何因而下淚衆人莫不灑泣普明兄弟叩頭乞外更思
分異十年遂還同居住每年春總集大儒衛隆田元鳳
等講於郡學掾吏文案之暇悉令受書時人指吏曹為
學生屋

後周長孫儉初仕魏為荊州刺史所部鄭縣令泉璨為
民所訟推治獲實儉即大集僚屬而謂之曰此繇刺史
教誨不明信不被物是我之愆非泉璨之罪遂於廳事

前肉袒自罰捨琛不問於是屬城肅勵莫有犯法西魏
文帝璽書勞之太祖又與儉書曰近行路傳公以部內
縣令有罪遂自杖三十用肅羣下吾昔聞王臣蹇蹇匪
躬之故蓋謂憂公忘私知無不為而已未有如公刻身
罰己以訓羣僚者也聞之嘉歎荆蠻舊俗少不敬長儉
殷勤勸導風俗大革務廣耕桑兼習武事故得邊境無
虞民安其業吏民表請為儉構清德樓樹碑刻頌朝議

許焉

柳霞為霍州刺史導民務先以德再三不用者乃微加
貶異以耻之而已其下感而化之不復為過咸曰我君
仁惠如此其可欺乎

薛慎為湖州刺史州界既雜蠻夷常以劫掠為務慎乃
集諸豪帥具宣朝旨仍令首領每月一叅或須言事者
不限時節慎每見必殷勤勸誡乃賜酒食一年之間翕
然從化諸蠻乃相謂曰今日始知刺史真民之父母也
莫不欣悅自是襁負而至者千餘戶蠻俗婚娶之後父

母雖在卽與別居慎謂守令曰牧守令長是化人者也
豈有其子娶妻便與父母離拆非唯蠻俗之失亦是牧
守之罪慎乃親自誘導示以孝慈并遣守令者喻所部
有數戶蠻別居數年遂還侍養及行得果膳歸奉父母
慎以其從善之速具以狀聞有詔蠲其賦役於是風化
大行有同華俗

樂遜為湖州刺史民多蠻左未習儒風遜勸勵生徒加
以課試數年之間化洽州境蠻俗生子長大多與父母

別居遜每加勸導多革前弊在任數載頻被褒錫

隋于義字慈恭為武安太守專崇德教不尚威刑有郡民張善安王叔兒爭財相訟義曰太守德薄不勝任之所致非其罪也於是取財倍與二人論而遣去善安等各懷耻愧移貫他州於是風教大洽以其德化人皆此類也

梁毗為西寧州刺史在州十一年先是蠻夷酋長皆服金冠以金多者為豪雋繇此遞相陵奪每干邊境略無

寧歲毗患之後因諸酋長相率以金遺毗於是置金坐側對之慟哭而謂之曰此物饑不可食寒不可衣汝等以此相滅不可勝數今將此來欲殺我邪一無所納悉以還之於是蠻夷感悟遂不相攻擊高祖聞而善之

趙賢通為冀州刺史有人盜其田中蒿者為吏所執賢通曰此乃刺史不能宣風化彼何罪也慰喻而遣之令人載蒿一車以賜盜者媿惡過於重刑其以德化民皆此類也

令狐熙開皇中為桂州刺史先是州縣生梗長吏多不得之官寄政於總管府熙悉遣之為建城邑開設學校人夷感化焉

乞伏慧領潭桂二州總管三十一州諸軍事其俗輕剽慧躬行樸素以矯之風化大洽

楊汪字元度歷荆雒二州長史每聽政之暇必延生徒講授時人稱之

辛公義為牟州刺史下車先至獄中因露坐牢側親自

驗問十餘日間決斷咸盡方還大廳受領新訟皆不立
文案遣當直佐寮一人側坐訊問事若有不盡應須禁
者公義即宿廳事終不還閤人或諫之曰此事有程使
君何自苦也答曰刺史無德可以導人尚令百姓係於
囹圄豈有禁人在獄而心自安乎罪人聞之咸自歎服
後有欲爭訟者其鄉閭父老遽相曉曰此蓋小事何忍
勤勞使君訟者多兩讓而止

梁彥光為相州刺史自齊亡衣冠士人多遷關內唯技

巧商販及樂戶之家移實州郭繇是人情險詖妄起風
謠訴訟官人萬端千變彥光欲革其弊乃用秩俸之物
招致山東大儒每鄉立學非聖哲之書不得教授嘗季
月招集之親臨策試有勤學異等聰令有聞者升堂設
饌其餘並坐廊下有爭訟惰業無成者坐之庭中設以
草具及大成當舉行賓貢之禮行於郊外祖道并以財
物資之於是人皆克勵風俗大改有塗陽人焦通性酣
酒事親禮闕為從弟所訟彥光弗之罪將至州學會觀

於孔子廟于時廟中有韓伯瑜母杖不痛哀母力弱對
母悲泣之像通遂感悟既悲且愧若無自容彥光訓諭
而遣之後改過勵行卒為善士以德化人皆此類也吏
人感悅畧無爭訟

柳旦為龍川太守民居山洞好相攻擊旦開設學校大
變其風煬帝聞而善之下詔褒美

唐高士廉太宗時為益州大都督府長史蜀土俗薄畏
鬼而惡疾父母病有危殆不躬扶持杖頭挂食遙以哺

之兄弟異財罕通假借士廉隨方誘勸有不悛者親率官屬詣其門而諭之繇是邑里翕然多為孝悌兼命儒生講論墳典勉勵後進西蜀學校一時復興

高智周高宗時為壽州刺史每行部必先召學官見諸生試其講誦訪以經義及時政得失然後問及墾田獄訟之事

李栖筠代宗時為浙西觀察使屬師旅饑饉之後百姓流離講誦之徒數年竟絕乃大開學館招延秀異表大

儒河南褚冲吳郡何員等超資授官為學者師身自執
經質問疑義繇是遠邇趨風鼓篋升堂者至數百人教
化大行俗若鄒魯

馬燧為懷州刺史乘兵亂後其夏大旱人失耕種燧乃
務教化將吏有父母者燧輒造之施敬收瘞暴骨去其
煩苛至秋田中生穠禾人頗便之

張鎰為濠州刺史招經術之士講訓生徒比去郡升明
經者四十餘人

陽城德宗時為道州刺史在州以家人法為理吏人宜
罰者罰之宜賞者賞之一不以簿書介意前刺史有贓
罪觀察使方推鞠之吏有幸於前刺史者捃拾其不法
事以告欲自為功城立柱殺之賦稅不登觀察使請誚
讓州上考功第城自署其第曰撫字心勞徵科政拙考
下下觀察使嘗使判官督其賦至州恠城不出迎以問
州吏吏曰刺史聞判官來以為已有罪自囚於獄不敢
出判官大驚馳入謁城獄曰使君何罪某奉命來候安

否耳留一二日未去城因不復歸館門外有故門扇橫
城晝夜坐卧其上判官不自安辭去其後觀察使又遣
他判官崔某往案之王欽若等曰崔承命不辭載妻子
以行中道而逃

令狐楚穆帝時為宣武軍節度使先是汴卒驕悍累逐
主帥韓弘以重法繩之人皆偷生莫革其性楚以仁惠
明其教令人遂從化

曹華為沂州刺史初李正己盜有青鄆十二州傳襲四

世垂五十年人俗頑鷙不知禮教華令將吏曰鄒魯儒者之鄉不宜忽於禮義乃躬禮儒士習俎豆之容春秋釋奠於孔子廟立學講經儒冠四集出家財贍給俾成名入仕其往者如歸

鄭澣文宗時為興元尹先是澣父餘慶之鎮興元創儒宮設學館至澣之來復繼前美

冊府元龜卷六百七十六

欽定四庫全書

子部
冊府元龜卷六百七十八

詳校官中書臣吳瓌

侍讀臣孫球覆勘

總校官庶吉士臣何思鈞

校對官典簿臣劉景岳

謄錄監生臣龔輝遠

欽定四庫全書

冊府元龜卷六百七十七

宋 王欽若等撰

牧守部

能政

自秦氏罷侯置守漢室之興率循無改垂及中葉品式
備具故有與我共此之嘆而二千石之著治効者率加
褒賞以申勉勵史氏所述循吏為盛焉東京而下咸可
徵也自非厲精為治正身率下遵道德齊禮之訓以變

風美俗推務本明利之術以厚生阜財措枉而擊強興廉而崇讓先之以條教濟之以仁惠居之以寬簡輔之以強明又曷能致政治之清夷吏人之歡愛所居民富所去見思生有榮號死見奉祀斯仲尼所謂既富而教三年有成者為不誣矣

漢韓延壽為淮陽太守治甚有名徙潁川潁川多豪彊難治國家嘗為選良二千石延壽在郡數年徙為東郡

太守以黃霸代居潁川霸因其迹而大治

延壽為政事迹並見牧守

教化
門

黃霸為潁川太守前後八年郡中愈治天子以霸治行
詔賜爵關內侯黃金百斤秩中二千石自漢興言治民
吏以霸為首入守京兆尹

趙廣漢為京兆尹奏請令長安游徼獄吏秩百石

特增
其秩

以厲
其行

其後百石吏皆羞自重不敢枉法妄繫留人京兆

政清吏民稱之不容口長老傳以為自漢興治京兆者
莫能及

王成為膠東相治甚有聲宣帝最先褒之賜爵關內侯
秩中二千石

翟方進為朔方刺史居官不煩苛所察應條輒舉甚有

威名再三奏事

刺史歲盡輒奏事京師也

召信臣為南陽太守為民興利戶口增倍賊盜訟獄哀
止吏民親愛信臣號之曰召父

薛宣為臨淮太守政教大行入守左馮翊宣為吏賞罰

明用法平而必行所居皆有條教可紀多仁恕愛利人

愛人

而安
利也

馮野王為隴西太守以治行高入為馮翊京師稱其威
德又為上郡太守

馮遂野王弟也為清河都尉隴西太守治行廉平

馮立遂弟也為五原太守徙西河上郡立居職公廉治
行畧與野王相似而多知有恩貸好為條教吏民嘉美
立更歷五郡所居有迹

後漢宋均為河內太守政化大行均嘗寢病百姓耆老

為禱請旦夕問起居其為民愛若此

馮豹為武威太守親事二年河西稱之

杜詩為南陽太守性節儉而政治清平以誅暴立威善於計畧省愛民役視事七年政化大行

慶鴻為瑯琊會稽二郡太守所在有異迹

曹褒為河內太守時春夏大旱糧穀踊貴褒到乃省吏并職退去姦殘澍雨數降其秋大熟百姓給足流冗皆

還

郭伋為并州刺史所過問民病苦聘求耆德雄俊設几杖之禮朝夕與叅政事

謝夷吾遷鉅鹿太守所在愛育人物有善績

歐陽歙為揚州牧遷汝南太守推用賢俊政稱異迹

魯王興齊武王縝之子為弘農太守有善政

王堂為巴郡太守吏民生為立祠永建中為魯相政存

簡一至數年無辭訟遷汝南太守郡內稱治

陸康為武陵太守轉守桂陽樂安二郡所在稱治

陳寵為廣漢太守西川豪右并兼吏多姦貪訴訟日百
數寵到顯用良吏王渙鐔顯等以為腹心訟者日減郡
中清肅

衛颯為桂陽太守先是含汪湏陽曲江三縣越之故地
武帝平之內屬桂陽民居深山濱溪谷習其風土不出
田租去郡遠者或且千里吏事往來輒發民乘船名曰
傳役每一吏出徭及數家百姓苦之颯乃鑿山通道五
百餘里列亭傳置郵驛於是役省勞息姦吏杜絕流民

稍還漸成聚邑使輸租賦同之平民凡理郵民事居官如家其所施政莫不合於物宜視事十年郡內清理宋登為潁川太守市無二價道不拾遺

李膺為蜀郡太守修庠序設教條明法令恩威並行蜀之珍玩不入於門

陳蕃為樂安太守時李膺為青州刺史各有威政屬城聞風皆自引去蕃獨以清績留焉

延篤為左馮翊徙京兆尹其政用寬仁憂恤民黎擢用

長者與叅政事郡中歡愛三輔咨嗟焉先是陳留邊鳳
為京兆尹亦有能名郡人為之語曰前有趙張二王後
有邊延二君

景毅為益州太守討定叛夷毅初到郡米斛萬錢漸以
仁恩少年間米至數十

少年未
多年也

徐璆歷任城汝南東海三郡所在化行

公沙穆為遼東屬國都尉善得吏人歡心

史敞為京兆尹化有能名尤善條教見稱於三輔也

王商益州牧劉焉以為蜀郡太守有治聲

駱俊字孝遠有文武才幹為陳相值表術僭號兄弟忿爭天下鼎沸羣賊並起陳與比界姦慝四布俊厲威武保疆境賊不敢犯養濟百姓災害不生歲獲豐稔

魏劉靖為河南尹散騎常侍應璩書與靖曰入作納言出臨京任富民之術日引月長藩落高峻絕穿窬之心五種別出遠水旱之災農器必具無失時之闕蠶麥充備無雨濕之虞封符指期無流連之吏鰥寡孤獨蒙廩

賑之實加之以明槩幽微重之以秉憲不撓有司供承
王命百里垂拱仰辦雖昔趙張二王之治未足以方也
靖為政類如此初雖似碎密終於百姓便之

司馬朗為兗州刺史政化大行百姓稱之

杜畿為河東太守太祖征漢中遣五千人運運者自率
勉曰人生有一死不可負我府君終無一人逃亡其得
人心如此

梁習為并州刺史邊境肅清百姓布野勤勸農桑令行

禁止貢達名士咸顯於世太祖嘉之賜爵關內侯更拜
為真長老稱詠以為自所聞識刺史未有及習者

張既為雍州刺史後轉梁州既臨二州十餘年政惠著
聞

倉慈為燉煌太守民夷稱其德惠後皇甫隆為太守燉
煌人以為隆剛斷嚴毅不及於慈至於勤恪愛惠為下
興利可以亞之

楊阜為武都太守會蜀先主取漢中以逼下辯太祖以

武都孤遠欲移之恐吏民戀上阜威信素著前後徙民
氏使居京兆扶風天水界者萬餘戶徙郡小槐里百姓
襁負而隨之為政舉大綱而已下不忍欺

蜀馬忠為牂牁太守郡丞朱褒反叛亂之後忠撫育卹
理甚有威惠

王祗為犍為太守後有廣漢王離代祗為太守亦有美
績雖聰明不及祗而文采過之也

吳謝景為豫章太守在郡有治迹吏民稱之以為前有

顧邵其次即景

周魴為鄱陽太守在郡十三年賞善罰惡威恩並行

吳彥為交州刺史在鎮二十餘年威恩宣著南州寧靖
晉鄭袤為廣平太守以德化為先善作條教郡中愛之
司馬芝為河南尹居官十一年自魏迄今為河南尹者
莫及之

劉弘為荊州刺史假節都督荆交廣州諸軍事其在江
漢值王室多難得專命一方盡其器能推誠羣下勵以

公義簡刑獄務農桑每有興發手書郡國丁寧款密故
莫不感悅顛倒奔赴咸曰得劉公一紙書賢於十部從
事也

劉殷為新興太守明刑旌善甚有政能

范晷為馮翊太守甚有政能善於綏撫百姓愛悅之

鄧攸為吳郡太守攸在郡刑政清明百姓歡悅為中興
良守

王况為豫州刺史探尋善政察賈逵已來法制禁令諸

所施行擇善者而從之

丁紹字叔倫為廣平太守政平訟理道化大行于時河北騷擾靡有完邑而廣平一郡四境乂安是以皆悅其法而從其令

宋劉義欣高祖弟道隣子也為豫州刺史鎮壽陽于時土境荒毀人民凋散城郭頽敗盜賊分行義欣綱維補緝隨宜經理劫盜所經立討誅之境內畏服道不拾遺城府庫藏並皆完實遂為盛藩強鎮

孔季恭為會稽相務存治實勅止浮華翦罰遊惰繇是
寇盜哀止境內肅清

杜慧度為交州刺史布衣蔬食儉約質素能彈琴頗好
莊老禁斷淫祀崇修學校歲荒民饑則以私祿賑給為
政纖密有如治家繇是威惠沾洽姦盜不起乃至城門
不夜閉道不拾遺

王僧虔初監吳郡太守後為湘州刺史所在以寬惠稱
裴松之為永嘉太守勤郵百姓吏民便之

陸徽為益州刺史隱卹有方威惠兼著寇盜靜息民物
殷阜蜀土安悅

阮長之歷東莞武昌臨海太守皆有風政為後人所思
宋世言善治者咸稱之

吉翰為益州刺史著美績甚得方伯之體論者稱之
臧質為建平太守甚得蠻楚心南蠻校尉劉湛還朝稱
為良守遷寧遠將軍

申恬為山陽太守善於治民所蒞有績為太山太守威

惠兼著吏民便之

杜驥為青冀二州刺史在任八年惠化著於齊土自義熙至于宋末刺史唯羊穆之及驥為吏民所稱詠

張岱為益州刺史數年益土安其政

劉損為義興太守時東土殘饑太祖遣揚州治中沈演之東入賑卹以損綏撫有方稱為良守

南齊虞愿宋末為晉平太守有異政後王秀之為郡與朝士書曰此郡承虞公之後善政猶存遺風易遵差得

無事

安陸王緬為吳郡太守少時大著風績竟陵王子良與緬書曰竊承下風數十年來未有此政世祖嘉其能轉郢州刺史

張環為雍州刺史加都督徵拜左戶尚書後安陸王緬臨雍州行部登蔓山有野老來乞緬問何不事產而行乞耶答曰張使君臨州理物百姓家得相保後人政嚴故至行乞緬繇是深加嗟賞

傅琰為南郡內史行荊州事時長沙太守王沈新蔡太守劉聞慰晉平太守丘仲起長城縣令何敬叔故彰縣令丘寂之皆有能名而不及琰也

梁永陽王敷少有學業仕齊為隨郡內史招懷遠近士庶安之以為前後之政莫及齊明帝謂徐孝嗣曰學士舊例不改理官聞蕭隨郡唯置酒清言而路不拾遺行何風化以至於此對曰古者修文德以來遠人況止郡境而已帝稱善

長沙王懿為晉陵太守曾未期月訟理人和稱為善政
襲吳平侯勵為淮南太守以善政稱遷豫章內史道不
拾遺男女異路

孔休源為南郡太守行州府事甚有治績平心決斷請
託不行高祖深嘉之

衡山縣侯恭為雍州刺史簡文少與恭遊特被賞狎至
是手令勗以政事恭至州政績有聲百姓請於城南立
碑頌德詔許焉名為德政碑

夏侯詳為湘州刺史詳善吏事在州四載為百姓所稱
王志為宣城內史清謹有恩惠郡民張倪吳慶爭田經
年不決志到官父老乃相謂曰王府君有德政吾曹鄉
里乃有此爭倪因相攜請罪所訟地遂為閑田

夏侯亶為吳興太守有惠政遷司州刺史又為邊人所
悅服

何敬容為建安內史清公有美績吏民稱之遷吳郡太
守為政勤恤民隱辯訟如神視事四年治為天下第一

世稱為何吳郡後謝舉為吳郡太守聲跡畧相比

劉之亨代兄之遴為南郡太守有異政荆土懷之惡斥其名號為大南郡小南郡

王瑩為東陽太守居郡有惠政遷吳興太守頻處二郡皆有能名

謝覽為吳興太守初齊明帝及覽父淪東海徐孝嗣並為吳興號稱名守覽皆欲過之

劉潛字孝儀為臨海太守是時政網疎濶百姓多不遵

禁孝儀下車宣布條制勵精綏撫境內翕然風俗大革
何遠為宣城太守郡經寇抄盡心綏理復著名迹后為
始興內史在官好開途巷修葺牆屋民居市里城隍廐
庫所過若營家焉

陳王勵為晉陵太守在郡甚有威惠郡人表請立碑頌
勵政績許之

陸子隆為荊州刺史時新置治于公安城池未固子隆
修建城郭綏集夷夏甚得民和當時號為稱職三年吏

民詣都上表請立碑頌美功績詔許之

後魏長孫肥道武時為兗州刺史撫綏河南得吏民心
威信著於淮泗

張恂為廣平太守招集離散開建學校優顯儒士吏民
歌詠之於時喪亂之後罕能克厲唯恂當官清白仁恕
臨下百姓親愛之其治為當時第一

陳留王虔子崇為并州刺史有政績

淮南王世遵為北平將軍定州刺史百姓安之為幽州

刺史性清和推誠化導百姓樂之

臨淮王昌弟孚為冀州刺史勸課農桑境內稱為慈父
隣州號曰神君

任城王澄為徐州刺史甚有聲績

任城王雲為冀州刺史留心政事甚得下情

淮陽王孝友為滄州刺史在郡積年以法自守甚著聲
稱

元子英為梁州刺史在仇池六載甚有威惠之稱

安豐王猛子延明為豫州刺史甚有政績

崔寬為鎮西將軍陝城鎮將弘農土出漆蠟竹木之饒路與南通販貿來往家產豐富而百姓樂之諸鎮之中號為能政

穆羆為汾州刺史前刺史劉升在郡甚有威惠前定陽令吳平仁亦有恩信羆並為表請之羆既頻薦升等所部守令咸自砥礪威化大行百姓安之

元欣為荊州刺史轉齊州刺史欣在二州頻得人和

張彛為秦州刺史彛敷政隴右多所制立宣布新風革其舊俗民庶愛仰之

張蒲為相州刺史扶弱抑強進善黜惡教化大行

李韶為冀州刺史清簡愛民甚收名譽後轉定州刺史二州既連接百姓素聞風德州內大治

陸昕之為兗州刺史尋進號安東將軍治有名績仍除青州刺史在州著寬平之稱轉安北將軍相州刺史陸凱為正平太守在郡七年號為良吏

源懷為長安鎮將雍州刺史清儉有惠政善於撫恤劫盜息止流民皆相率來還

薛虎子為徐州刺史孝文曾從容問秘書丞李彪曰卿頻使江南徐州刺史政績何如彪曰綏邊布化甚得其和孝文曰朕亦知之

竇瑾為長安鎮將都督秦雍二州諸軍事在鎮八年甚著威惠

李安世為相州刺史敦勸農桑禁斷淫祀

崔挺為光州刺史威恩並著風化大行及散騎常侍張
彞兼侍中巡行風俗見挺政化之美謂挺曰彞受使省
方採示謠訟入境觀政實愧清吏之名

畢元賓為兗州刺史為政清平善撫民物百姓愛樂之
崔亮為雍州刺史性公清敏于斷決三輔服其德政
蘇椿為武功郡守既為本邑以清儉自居小大之政必
盡忠恕

裴宣為司州別駕明敏有器幹總攝州府事無疑滯遠

近稱之

崔休遷安東將軍青州刺史青州九郡民單擲李伯微
劉通等一千人上書頌休德政靈太后善之

張普惠為東豫州刺史時淮南九戍十三郡猶有梁氏
前弊別郡異縣之民錯雜居止普惠乃依次括比省減
郡縣上表陳狀詔許之宰守因此綰攝有方姦盜不起
民以為便

竇瑗為廣宗太守治有清白之稱廣宗民情凶戾前後

累政咸見告訟唯瑗一人終始全潔轉中山太守聲譽甚美為吏民所懷及北齊神武輔政班書州郡誠約牧守令長稱瑗政績以為勸勵

北齊永安王浚為青州刺史聰明矜恕上下畏服之趙郡王子叡為定州刺史加撫軍將軍六州大都督時年七十留心庶事糾摘姦非勸課農桑接禮名雋所部大治稱為良牧

裴讓之為清河太守至郡未幾楊愔謂讓之諸弟曰我

與賢兄交款企聞善政適有人從清河來云姦吏斂迹
盜賊清靜期月之期翻然更速

宋世良為清河太守天保中大赦郡先無一囚率羣吏
拜詔而已獄內櫓生桃樹蓬蒿亦滿每日衙門虛寂無
復訴訟

封子繪為鄭州刺史子繪曉達政事長於綏撫歷宰州
郡所在安之

房謨為兗州刺史先是當州兵皆寮佐驅使饑寒死病

動至千數謨至皆加簡勒不令煩擾以休假番代洗沐
督察主司親自簡視又使傭賃令作衣服終歲還家無
不溫飽全濟甚多時梁魏和好使人入其界者咸稱歎
之轉徐州刺史始謨在兗州彭城慕其德化及為刺史
合境欣悅神武與諸州刺史書敘謨及廣平太守羊敦
廣宗太守許季良等清能以為勸勵

許惇為陽平太守時遷都於鄴陽平為畿郡軍國責辦
賦歛無准又勲貴屬請朝夕徵求惇並御之以道上下

無怨政為天下第一特加賞異圖形於閣詔頒天下歷
魏尹齊梁二州刺史政並有治聲遷大司農

蕭祗字敬式梁武弟南平王偉之子也在梁為東揚州
刺史于時江左承平政寬人慢祗獨蒞以嚴切梁武悅
之遷北兗州刺史

袁聿修為信州刺史即其本鄉也時人榮之為政清靜
不言而治長吏以下爰逮鰥寡孤幼皆得其歡心武平
初御史普出過詣諸州梁鄭兗疆境連接州之四面悉

有舉劾御史竟不到信州其見知如此又為博陵太守
數年大有聲績遠近稱之

後周獨孤信為秦州刺史先是守宰闇弱政令乖方民
有冤訟歷年不能決信在州事無擁滯示以禮教勸以
農桑數年之中公私富實流民願附者數萬家太祖以
其信著遐邇故賜名為信

張軌為河北郡守在郡三年功績甚著臨民治術有循
吏之美大統間言宰民者多推尚之

揚雄為涪州刺史俗雜實渝民多輕猾雄威惠相濟夷
夏安之

竇熾為大都督原州刺史抑挫豪右申理幽滯每親巡
壟畝勸民耕桑在州十載甚有政績

令狐整為豐州刺史廣布恩威傾身撫綏數月之間化
洽州府豐州舊治不居民中賦役叅集勞逸不均整請
移居武當詔可其奏獎勵撫導遷者如歸旬月之間城
府周備席固之遷也其部曲多願留為整左右整諭以

朝制弗之許焉莫不流涕而去及整秩滿代至人吏戀之老幼送整遠近畢集數日停留方得出界其得人心如此

唐瑾為蔡州刺史歷柘州硤州所在皆有德化人吏稱之

梁臺為鄜州刺史性疏通恕已待物至於蒞民處政尤以仁愛為心

韋孝寬除浙陽郡守時獨孤信為新野郡守同荊州與

孝寬情好款密政術俱美荆部吏人號為連璧

宇文神舉為并州刺史州既齊氏別都控帶要重平定
甫爾民俗澆訛豪右之家多為姦猾神舉勵精為治示
以威恩旬月之間遠邇悅服

留璠為同和郡守先羌降附洮陽共和二郡羌民嘗越
境詣璠訟理焉其德化為他界所歸仰如此蔡公廣時
鎮隴右嘉璠善政及遷鎮陝州欲啟璠自隨羌人樂從
者七百人聞者莫不歎異

韓盛為新平郡守居官清淨嚴而不殘矜恤孤貧抑挫
豪右賊盜止息郡境肅然

幽公廣太祖姪孫為梁州總管秦州刺史性明察善綏
撫民庶畏而悅之

席固歷豐湖昌三州刺史蒞官之處頗有聲績

權景宣為南陽郡守寇盜斂迹民得肄業百姓稱之立
碑頌德

辛昂為龍州長史領龍安郡事州帶山谷舊俗生梗昂

威惠洽著吏民畏而愛之

梁睿為敷州刺史涼安二州總管俱有惠政

隋豆盧勣仕周為渭州刺史甚有惠政華夷悅服德澤
流行

于墾為汴州刺史甚有能名高祖聞而善之優詔褒揚
賜帛百疋後歷邢洛熊州刺史並有惠政

梁彥光為岐州刺史甚有惠政轉相州刺史下車發摘
姦隱有若神明又以德化人吏人感悅略無爭訟

令狐熙為滄州刺史在職數年風教大洽稱良二千石
開皇四年高祖幸雒陽熙來朝吏人恐其遷悲泣於道
及還百姓出境迎謁歡叫盈路及為汴州刺史下車禁
遊食抑工商人有向街開門者杜之船客停於郭外星
居者勒為聚落僑人遂令歸本其有滯獄並決遣之令
行禁止高祖聞而嘉之

辛彥之為隨州刺史遷潞州刺史前後俱有惠政

慕容三藏為廓州刺史民歌頌之高祖聞其能屢有勞

問又為和州刺史轉淮南郡太守所在有惠政

柳儉為廣漢太守甚有能名高祖以儉仁明著稱擢拜
蓬州刺史獄無繫囚遷汴州刺史在職十餘年荆夷悅
服

韋協字欽仁歷定息秦三州刺史皆有能名

河間王弘每晉王廣入朝弘輒領揚州總管及晉王歸
弘復還蒲州在官十餘年風教大洽

韋壽字世齡為常毛二州刺史頗有治名

蘇孝慈為浙州刺史遷洪州總管俱有惠政

李諤為通州刺史甚有惠政民夷悅服

辛公義為岷州刺史合境之內呼為慈母後遷牟州刺史時東山霖潦自陳汝至于滄海皆苦水災境內犬牙獨無所損

敬肅為幽州長史遷衛州司馬俱有異績

公孫景茂為汝南太守息州刺史法令清靜德化大行又歷伊道淄三州刺史皆有德政論者稱為良牧

侯莫陳頴為桂州總管十七州諸軍事至官大崇恩信
人夷悅服煬帝即位徵還京師後拜常山太守其年嶺
南閩越多不附帝以頴前在桂州有惠政為南方所信
復拜南海太守

丘和為代州刺史在郡善撫吏士甚得歡心

宇文弼歷朔代吳三州刺史皆有能名除泉州刺史

薛道衡為簡校襄州總管在任清簡吏民懷其惠

張濟歷撫顯齊三州刺史俱有能名

段文振為石河二州刺史甚有威惠遷蘭州總管

房彥謙為鄆州司馬時鄆州久無刺史州務皆歸彥謙多有異政

柳機為華州刺史歷冀州前後作牧俱稱寬惠

賀若誼歷靈邵二州刺史原信二州總管俱有能名

柳旦歷羅浙魯三州刺史並有能名

柳謩之為肅州刺史轉息州俱有惠政

楊屏為寧都太守歷吳州總管甚有能名

張焯為冀州刺史進位上開府吏民悅服稱為良二千石

長孫平歷許貝二州俱有善政鄴都俗薄舊號難治前後刺史多不稱職朝廷以平所在有善政轉相州刺史甚有能名

趙賢通為冀州刺史甚有威德嘗有疾百姓奔馳爭為祈禱其得民情如此

唐權萬紀武德中為西韓州刺史在州以清幹著稱

韋仁壽武德中為雋州都督府長史時南寧州內附高祖令仁壽檢校南寧都督既聽政於越雋法令清肅人懷懼悅

張元濟為高陽郡丞時無郡將元濟獨統大郡吏人畏悅

武士護武德末為揚州都督府長史開闢田疇示以刑禮數月之間歌謠載路

李桐客太宗貞觀初累遷通鎮二州刺史所在清平流

譽百姓呼為慈父

崔幹歷宋幽二州刺史為下所懷

劉德威為綿州刺史以廉平著稱百姓為之立碑

盧祖尚為蔣州刺史轉壽州都督又轉瀛州所在之職
皆稱政理

薛大鼎貞觀中為滄州刺史大鼎與瀛州刺史賈敦頤
冀州刺史鄭德本俱有美政河北號鐺脚刺史

黨仁弘為廣州都督有方略所在皆有稱績時有扶風

強竇質亦以幹能致位尚書郎刺史議者以仁弘為羌中之絕竇質為巴中之絕繇是厯居藩要

李君球為興州刺史遷揚州大都督府長史政尚嚴肅人吏憚之盜賊屏跡高宗頻降書勞勉

高智周總章中為壽州刺史政存寬慰百姓安之

田仁會為平州刺史勸學務農稱為善政

蔣儼為幽州司馬以善政為巡察使劉祥道所薦擢為會州刺史改為蒲州刺史蒲州戶口殷劇前後刺史多

不稱職儼下車未幾令行禁止稱為良牧

薛謙光則天時為常州刺史先是李嶠等奏人情重內官輕外職乃命韋嗣立及楊再思等二十人各以本官檢校刺史其後政績可稱者唯謙光徐州刺史司馬鎰二人而已

狄仁傑為寧州刺史撫和戎夏人得歡心郡人勒碑頌德御史郭翰巡察隴右所至多所按劾及入寧州境內耆老歌刺史德美者盈路翰既授館召州吏謂之曰入

其境其政可知也願成使君之美無為久留州人方散
翰薦名於朝徵為冬官侍郎

薛季昶為雍州長史威名甚著前後京尹無及之
者又為魏陝二州刺史雒州長史所在皆以嚴肅為
政

楊元琰歷蘄蒲晉魏宣許六州刺史涼梁二郡都督荆
府長史前後九度以清白昇進再降璽書褒美

李濬為潤虢潞三州刺史又拜益州長史劔南節度所

歷皆以誠信待物稱為良吏

姚元之為揚州長史淮南按察使為政簡肅人吏立碑
紀德俄除同州刺史

嗣吳王琨歷淄衛宋鄭梁幽六州刺史皆有能名

李傑為河南尹勤於聽理每有訢別雖衢路當食無廢
處斷繇是官無留事人吏愛之

苗晉卿為安康郡太守歲餘郡中稱理遷魏郡太守河
北採訪使居職三年政化大行

崔隱甫為太原尹人吏刊石頌其美政後為東都留守
為政嚴肅甚為吏人之所憚

崔琳有幹局玄宗開元中歷典數州皆知名

李峴為河南少尹魏郡太守入為金吾將軍遷京兆尹
所蒞皆著聲績

第五琦為朗州刺史甚有能名

王翊自折衝授辰州刺史遷朗州皆有政術

嚴郢為京兆尹專以文學參朝廷論議前後請減諸色

丁匠數千百人號為稱職

張延賞為北都副留守河南尹江陵尹成都尹連統四鎮所至稱理其去也皆刻石紀焉

呂諲肅宗上元元年罷相授太子賓客尋為荊州節度諲初在廟堂無異稱及理江陵三年號為良牧

蕭復大厯中為歙州池州刺史以理化著聞遷常州刺史

李泌為澧州杭州刺史並以理行稱

李惠登為隋州刺史惠登樸素不知學居官無枝葉率心為政皆與理順利人者因行之病人者因去之二十年間田疇闢戶口加諸州奏吏入其境無不訶謠其能及于頓為山東道節度以其績上聞加御史大夫升其州為上

閻濟美自婺州刺史為福建觀察復為潤州刺史浙西觀察所至以簡澹為理兩地之人常賦之外不知其他令狐彰為滑州節度使在職風化大行初滑州瘡痍未

復城邑為墟彰以身勵下一志農戰內簡軍戎外牧黎庶法令嚴酷人不敢犯數年間田疇大闢廩庫充積歲奉王稅及修貢獻未嘗暫闕

李復德宗建中貞元間為江陵少尹歷容州廣州刺史曉於政道所在稱理

張萬福貞元中歷典九郡皆有惠愛

于頔為蘇州刺史護溝瀆整街衢至今賴之

張敬則為鳳翔尹撫戎理俗人甚便之

穆贊為虔常二州刺史宣州觀察使所蒞皆有政聲

渾鎬太師瑊第二子性謙謹多與士大夫游歷延鄧唐等州刺史軍政吏職有可稱者

薛華為汝州刺史有能名又為浙江西道觀察使廉風俗守法度人甚安之

王紹為武寧軍節度使時承張愔之後兵驕難理紹修緝軍政人甚安之

武元衡代高崇文為劔南西川節度使高崇文既發城

盡載其軍資金帛器幕伎樂工巧以行元衡至則庶事
節約務以便人比三年公私稍濟

薛戎為衢湖常三州刺史遷浙東觀察使所蒞皆以政
績聞

楊於陵為浙江東道都團練觀察等使政聲大聞入拜
戶部侍郎

令狐楚為北都留守兼太原尹楚久在并州練其風俗
因人之利而利之故封內晏然

梁王師範自昭宗龍紀中為青州節度使十五年甚有殊政縣令刺史皆奏儒雅之士為之野無閑田路無拾遺

高途唐末為汴宋亳觀察判官僖宗文德初監宋州軍州事時螟潦之後編戶初復途克已為政始定履畝之稅以抑兼并太祖乃命管內如其制於是賦無虛額民無逋負公庾實而軍食羨矣改天平宣義兩府從事

趙昶唐末為陳州節度使昶以大寇削平之後益留心

於政事勸課農桑大布恩惠景福元年秋陳許將吏耆
老錄其功詣闕以聞天子嘉之命文臣撰德政碑植於
通衢以旌厥功

趙凝為襄州節度使作鎮數州甚有威惠

李珽監曹州事曹去京數舍吏民豪猾前後十餘政未
有善罷者珽在任期歲民庶以寧

後唐何瓚唐末代張承業知河東軍府處事明敏胥吏
畏其清而服其能好會賓友飲饌精簡談笑婉洽外疎

內密事有所執往復不回

李存賢權泌州刺史先是州當賊境不能保守乃於州南五十里據險立柵為治所已歷十餘年矣存賢至郡乃移復舊郡剗闢荆棘特立解舍州民完集莊宗嘉之轉檢校司空直拜刺史

李嗣昭為昭義軍節度使時大兵之後城中士庶饑死者半鄜里蕭然嗣昭緩法寬租勸農務穡一二年間軍城完輯三面隣敵軍抄縱橫昭設法枝梧邊鄙不聳

烏震為深州刺史嘗交儒者以講誦為樂其性純質以清直御下河北諸郡獨有政聲

周知裕歷房絳淄三州刺史宿州團練使知裕老於軍旅勤於稼穡凡為郡勸課皆有政聲朝廷嘉之遷安州留後

孫岳明宗天成初為潁州刺史潁久不治賦斂煩碎民不聊生岳至州召屬邑長吏里閭胥吏親問疾苦除正條賦率職務外其餘苛賦名目一切罷之潁人以狀上

聞加檢校太保後為耀州刺史閩州團練使所至稱治
晉劉遂清初仕後唐天成長興中歷典淄興登三郡咸
有善政

王傳極為寧州刺史境接蕃部以前政滋章民甚苦之
傳極自下車除去弊政數十件百姓便之不數月移刺
虢州為理清靜蒸民愛戴如寧州焉

李承約為黔南節度使數年之間巴邛蠻蛋不敢犯境
外勸農桑內興學校凶邪盡去民皆感之故父老數輩

重璽詣闕言其政化又聽留周歲徵為左衛上將軍
符令謙為趙州刺史下車布政務從安靜廷無訟獄無
囚廝養之徒皆贍於已無擾於下不周歲而部內大理
馮揮為靈州節度使清崗土橋之間皆是氏羌帳族從
來剽掠行旅須發援兵揮加以恩惠質以義信自是人
不帶劍道不拾遺境無寇盜市無游惰獄無枉撓吏無
緇蠹四民道釋咸得其所高祖優詔褒之

劉處讓為相澶衛等州觀察等使勤於公務孜孜求理

撫馭吏民不至苛察人甚便之

周邊蔚初仕晉開運初為亳州防禦使為政清肅亳民感其惠咸設齋以報之

白延遇廣順中為兗州防禦使在兗二年為政有聞人甚安之州民數百詣闕乞立德政碑以頌其美

冊府元龜卷六百七十七